

Kommunit tamaasa suleqatiginissaat aallartisarniaqqullugu, kommunillu akornanni naligiinnerulernissaq siunertaralugu iliuseqarnissamut periarfissaasinnaasunik qulaajaanissaq, tamatumanilu kommunit ataasiakkaat suliassanik isumagisassaminnik aningaasaqarnikkut periarfissaat eqqarsaatigalugu, taamatuttaarlu iliuuserisassat pineqartut aningaasatigut allaffissornikkullu kingunerisassaat qulaajaqqullugit Naalakkersuisut peqquneqarnissaattut Inatsisartut aalajangiiffigisassaannik siunnersuut. Qulaajaanissami aningaasatigut naligiissaarinermut aaqqissuussineq atuuttoq ilaatinneqassaaq, taamaattorli taannaannaq killiffigineqassanngilaq.
(Inatsisartuni ilaasortaqaq Sara Olsvig)

Akissuteqaat

(Aningaasanut Aatsitassanullu Naalakkersuisoq)

Aappassaaneerinnineq

Inatsiseqarnermut ataatsimiititaliap isumaliutissiissutaa sukumiisoq Naalakkersuisut sinnerlugit qujassutigiumavara. Ataatsimiititaliaq isumaliutissiissummini kommunit Namminersorlutillu Oqartussat akornanni aningaasaqarnikkut sunniivigeqatigiinnerup pingaarutaani pissutsit arlallit isumatuumik nalilersorpai. Isumaliutissiissullu taamaalilluni Naalakkersuisunit aamma siunissami suleriaqqinnermi atorineqarsinnaassaaq.

Ataatsimiititaliami amerlanerussuteqartut Naalakkersuisut allannguutissatut saqqummiussaannik akuersissuteqartut, Naalakkersuisut paasivaat.

Taamaalillutik Naalakkersuisut allannguutissatut siunnersuutip akuersissutigineqarnissaanut isumaqataanertik nalunaarutigaaq, siunnersuutillu Inatsisartuni naammassillugu suliarineqarnissaa qilanaaralugu.